

Ka patai te tiamana ki te kupu. Te whakautu (1) e Rima Rau e Whatekau-ma-waru pauna (£548). (2) Ka whakaturia te ropu hei kanohi hei reo hei ringa mo te iwi ka huaina te ingoa "Kahungumu Welfare Association" Te Mama o Te Ropu ko Lady Carroll. Te Tumuaki ko Wiri Kupa. Te Tiamana o pēka ki Te Wairoa ko Te Hata Tipoki. Te Hekeretari ko Tihi Kara.

Ko nga tohunga whakairo i nga rarangi ture mo te ropu ko Wiri Kupa me ona hoa roia katoa. Kia oti nga ture ka karangatia ai kia hui a Heretaunga.

Mo te ope haere. Heiaha koutou i mihia atu ai, notemea hoki "Tatau nei ano hoki Tatau!" Otira kei riri a Te Whare a Turi a Paku a Te Rito, me nga Kaumatua na a Pakuku ma, me nga kuia i te Maaki ra me o tatou rangatira e whakangaueue ma ra i nga momotu ahi. Kua huri te Tau Tawhito. Ko Te Tau Hou tenei me nga tumanako i roto i te ngakau koingo. Whiti! Kia kaha! E Te Atua, homai Te Kaha kia matou katoa!

NGA TAKARO. HE KUPU WHAKATUPATO. (Na R. T. K.)

O nga iwi mumu onamata ko nga Kariki te iwi kaha, te iwi tino ngakau-nui atu, ki nga mahi takaro. I te mea e haere tahanga ana ano nga tipuna o te Ingarihi kua whiwhi ke ratou ki nga matauranga hohonu, kua waihotia e ratou te takaro hei tikanga whakataetae. Ko te oma roa i te ao kua huaina ko te reihī Marathou—he kupu Kariki tenei; ko te huihuinga takaro o te ao katoa kua huaina ko nga takaro Olympic—he kupu Kariki ano. Ko te tino papa takaro o nga Kariki i tata ki Koriniti, nakonei i nga korero a Paora Apotoro ki te hunga o Koriniti he nui ana kupu i ahu mo te takaro—he iwi kua mohio ra hoki ki te takaro. I mea a Paora, "Kahore oti koutou i matau ki te hunga e oma whakataetae ana, e oma katoa ana ratou, kotahi ano ia mana te utu whakahonore?" (1 Kori. IX. 24.) I te tino ngakau—nui o nga Kariki ki nga mahi takaro e whakamoro ki ana nga taitama i o ratou hiahia, e pahi ana i o ratou tinana i nga wa katoa ana e tereina ana i a ratou. Ko te tama e puta i te omaoma ka tiparetia e te kingi ki te karauna rau rakau. Koia nei te "utu whakahonore," ko ia nei te "karauna pirau" e kīia ra e Paora no te mea he rau rakau e kore e roa ka ngingio ka maroke, otira he taonga tino honore ki te Kariki.

Ehara te takaro i te mahi; ko tona tino tikanga hei whakamohorahora, hei whakapakari i te tinana kia kaha ai mo nga mahi pumau, mo nga mahi tika. Ko nga tangata e tino tika ana kia takaro tonu ko nga tangata kei ro whare nei a ratou na mahi, ko nga tangata ranei he mahi hinengaro a ratou. Ko nga tamariki kura, ko nga tangata kareti nga tangata tino tika kia takaro tonu. Hai aha te takaro ma nga tangata ahu whenua kei te pakari tonu nei o ratou tinana? Heoi ano ra hei ngahau.